

INUIT ATAQATIGIIT

Inatsisartuni



UKA 2017/40
16.10.2017
Kelly Berthelsen

Naalackersuisut AIS19-imi ukiunilu missingersuusiorfiusuni misileraanermut aningaasaliissutinik 7,5 mio. Kr.-ainik amerlassusilinnik, aalisakkanik suliffissuit nunaqarfinni qerititsivinnik sanaartornissamik annertusaanissamulluunniit atugassatut qinnuteqarfigisinnaasaannik immikkoortitsinissamik peqquneqarnissaat pillugu Inatsisartuni aalajangiiffisassatut siunnersuut. Tapiissutit containerinik qerititsivinnik nutaanik pisinermut kiisalu aalisakkanik tunisasioffiit Nukissioffinnut attaviliineranut akiliutissaannut, containerinik qerititsivinnik pisinerup Nukissioffiit naammassisinnaasamikkut annertusaanerannut aningaasartuutitut akiliutitut atorreqarsinnaassapput. Aningaasanit atorreqartussangortitanit agguaassinermi piffinni suliffissaqartitsinikkut suliniutinik pisariaqartitsinerit isiginiarneqassapput.

(Inatsisartunut ilaasortaq Peter Olsen, Inuit Ataqatigiit)

Inuiaqatigiittut annerpaamik aalisarnermik nappateqartuugatta aalisarnerput pitsaanerpaamik ingerlasariaqarpoq. Atortorissaarutit pissarsiarineqarsinnaasut pitsaanerpaat pigisariaqarpavut, qujanartumillu amerlasuutigit nunarsuatsinni aalisarnermi atortorissaarutitigit siuarsimaneranut ilaalersimavugut.

Kisiannili nunami tunitsiveqarniarnikkut tussapittarnerput ukiut tamaasa misigisarparput.

Raajanik tunisassiorneq ataatsimut isigalugu ajunngitsumik ingerlagaluartoq qaleralinnik saarullinnillu tunisassiornermi suli pitsanngorsagassaqaqaagut. Taamaamat Peter Olsen Inuit Ataqatigiinneersup siunnersuutaa ilumut tunngavissaqarluarpoq.

Aalisakkat nalliusimaarnerat allanngorartaqimmat, aammalu sila aalisarsinnaanermut killiliisaqimmat aalisakkat nalliusimaartillugit silalu atussaattillugu aalisarneq sapinngisamik kipisaqattaanngitsumik ingerlasariaqarpoq.

Kisianni tunitsiviit tigooraasinnaassusiat amerlasuutigit toqqorsiveqarluanninnermik imaluunniit toqqorsiviit imaarneqartarnerisa akuttuallaarnerannit killilerneqartarpoq.

Taakku marluk pinngitsoornagit qanoq iliuseqarfigineqartariaqarput. Assartuineq akulikilliniannikkutsigu periarfissaq ajornannginnerpaaq tassaavoq toqqorsiveqarnerup annertusineqarnissaa.

Tamatumanissaaq periarfissat arlaliusinnaapput. Qerititsivissuit ataavartut atorreqassappat, imaluunniit angallattakkat, container-it atorreqassappat, aammalu tamakku qanoq sarfalersorneqassappat?

Periarfissat sorliit atorreqassanersut, imaluunniit assersuutigalugu assartuinerup allangortinneqarnissaa isumaliutigineqassanersoq matumuuna aalajangersimanerusumik siunnersuuteqarfigingikkaluarlugu Inuit Ataqatigiinniit siunnersuutip ataatsimiititaliamut attuumassuteqartumut ingerlatitassangortinneqarnissaa inassutigissavarput.